



Privođenje uhapšenih u Tužilaštvo Kantona Sarajevo



(Foto: M. Kadrić)

AKCIJA LIPSTICK Istražitelji SIPA-e uhapsili svodničku bandu

Satnica prostitutki 200 KM, klijenti im bili Turci i Arapi

Uhapšeni Samir Kurtović, koji je označen kao vođa bande, Omer Nargalić te Melisa Š., koja je navodno dobila imunitet te dala iskaz u svojstvu svjedoka

Istražitelji Državne agencije za istrage i zaštitu (SIPA) jučer ujutro su u operativnoj akciji „Lipstick“ razbili grupu koja se bavila navođenjem na prostituciju više djevojaka.

Moteli i hoteli

Kako saznajemo, tokom akcije uhapšeni su Samir Kurtović (31), Omer Nargalić (37), obojica policiji poznata od ranije, te izvjesna Melisa Š. (29). Akcija je provedena prema naredbama Kantonalnog suda u Sarajevu i Tužilaštva KS, a SIPA-i su podršku pružili pripadnici MUP-a KS. Kako nezvanično saznajemo, tokom saslušanja u SIPA-i osumnjičena Melisa dobila je imunitet od krivičnog gonjenja te je saslušana u svojstvu svjedoka. Navodno je istražiteljima zauzvrat otkrila strukturu te



Privodena i uhapšena Melisa Š.

način djelovanja ove svodničke grupe. Grupa se sumnja da je organizirala pružanje seksualnih usluga u Sarajevu i šire. Oni su kontaktirali s mušterijama, posredovali u određivanju tarife koja se kretala oko 200 maraka po satu, a također su odvozili prostitutke na zakazana mjesta,

a po obavljenom poslu su dolazili po njih. Mušterije su mahom bili Turci i Arapi koji su odsjedali u motelima i hotelima u Sarajevu, a i šire.

Pretreseni objekti

Organizatori su za sebe zadržavali 50 posto od dogovorene cijene za pružanje seksualnih usluga. Na saslušanju Nargalića i Kurtovića prisustvovao je njihov advokat Kadrija Kolić.

Nargaliću se na teret stavljalo da je postao pripadnik kriminalne grupe te da je pomagao u organiziranju krivičnih djela koja im se stavljaju na teret. Kurtović se tereti kao organizator grupe. Obojica su tokom saslušanja negira-

la krivicu - pojasnio nam je jučer Kolić.

Istražitelji su, također, pretresli i tri objekta na različitim lokacijama na području Kantona Sarajevo, odakle su izuzeli mobitele, SIM kartice, novac, dva komada vatrenog oružja s municijom i druge predmete koji će kao dokazi biti korišteni u sudskom postupku.

Inače, akcija je rezultat višemjesečne istrage koju su istražitelji SIPA-e proveli pod nadzorom Kantonalnog tužilaštva. Tokom istrage su osumnjičeni, navodno, i prisluškivani te praćeni, kao dio posebnih istražnih radnji.

Uhapšeni su sinoć predati u nadležnost postupajućeg tužioca.

Osumnjičenima je tužilac odredio zadržavanje od 24 sata, a sutradan će ih ispitati - kazao nam je Alem Hamzić, portparol sarajevskog tužilaštva.

Omer Nargalić je bio osuđen na deset godina i četiri mjeseca zatvora zbog ubistva Edina Kutlovca. Nargalića je tadašnji predsjednik Federacije BiH Živko Budimir 2012. godine pomilovao, nakon čega se našao na slobodi.

A. ALJIMI

Kurtović izmicao policiji

Samiru Kurtoviću nije prvi put da puni stupce crnih hronika. Naime, on je tokom 2013. godine ranjen u pucnjavi u Švrakinom Selu. Na njega su napadači pucali dok se nalazio u Nisanu Terano. Nakon ove pucnjave jedan od policij-

skih izvora nam je kazao za Kurtovića da je odavno operativno interesantna osoba te da se bavi privođenjem djevojaka, ali da je izmicao policiji zbog nedostatka dokaza. S obzirom na ove navode, Kurtović je praćen dvije godine.